



11
1774
12上



車驅車驅洛陽肆不得歸來夢中囁何如沮誦未舳初穴居

肝肝無文字 邵懿辰位西

曾文正仁和邵君墓志銘位西仁和邵氏諱懿辰潭思經

籍著尚書通義孝經通義書古文若干卷 孫琴西方伯

位西遺書跋位西初以中書直軍機處歷刑部員外郎深

識偉論往往驚其儕輩咸豐己未予由安慶引疾歸位西

在杭州未相見明年杭州陷遂及於難 又跋云位西文

字今可見者儀禮通論上卷古文三十餘篇吳仲宣制府

刻之淮安其讀書日記所謂枕行錄者丁君丙刻之杭州

橋西雜記邵君蕙西居京師購書甚富案頭置簡明目

錄一部所見宋元舊刻本抄本手記於各書之下以備他



1774
12

日校勘之資 蕙西遺稿借伯言過厥肆買書有作莊生
貧如涸轍鱗豈有羣書供獺祭翻新不肯襲糟粕屬書離
辭何詆麗古者私家無竹帛閭塾相傳但經菘後來著作
日紛紛棗木行將塞四裔傳摹甚易得不難翻使聰明受
揜蔽當年制字煩鬼哭更欲燒書起秦帝就中古冊不可
無一二精英擢蕪翳連鑣不厭百回看洛陽市肆歡游詣
先生度架盈古香十萬驕騶簡精銳此皆下駟不足貪識
寶波斯偶留憇叨同雅好耽細素愧與市人生校計得虞
重費囊底羞失每牽懷夢中嚙先生一笑子歸休臥想陶
陶結繩世
不為父母昆弟容舊誣一息鄭司農從前幾被南昌誤堂密

原來有美樅 葉名禮潤臣

張星鑑懷舊記葉侍讀名禮字潤臣湖北漢陽縣人道光
十七年舉人官內閣侍讀家門鼎貴依然寒素汲引人才
惟恐不及著敦夙好齋詩集八卷咸豐九年歿於杭州
潘文勤師橋西雜記序葉丈潤臣擁書十萬卷有志纂述
所著有周易異文疏證禮記鄭讀疏證戰國策地名考皆
未卒業橋西雜記則隨筆最錄之書橋西者丈所居紀文
達故宅當京師虎坊橋之西也 橋西雜記邵君蕙西購
書甚富名禮與之言曰彭文勤公嘗詆讀書敏求記染骨
董家氣我輩讀書當用力於其大者未可蹈此蔽也後閱
錢氏暴書雜記引鄭康成戒子書吾家舊貧不為父母昆

或書六

程

弟所容康成大儒不應出此語考元刻後漢書康成本傳無不字與唐史承節所撰鄭公碑合今本乃傳刻之誤此校書之有功於先賢者名禮始悔前言之陋 又云朱子嘗著韓文攷異校勘之學宋儒所不廢 又云偶憶李生甫先生跋盧氏抱經堂所校方言云冷淡生活勝於徵歌選舞多矣嘆爲至言 昌熾案潤臣父東卿先生名志詵收藏金石書畫甚富余曾見其家藏印曰葉志詵及見記又有葉名琛名禮兄弟同鑒定一印

關西夫子何爲者六經黥刑無完膚天下靡然嚮風矣一家偏好於癡符 路慎莊子端

張星鑑書關中事盤屋路德名進士也主關中書院講席

苦五經卷帙之多妄爲刪削所存者不及半書肆樂其易於鋟板也俗師亦樂其便於生徒習之旣久幾不知五經真本咸豐末浙西慎編修毓林視學陝甘以經題試士士子茫然不知在何經叩其故所讀者皆路德所刪之本耳使者大駭出示嚴禁欲燬其板一時燬之不勝燬也將入奏中丞某公止之由是學者因陋就簡之心固結不解而其書流傳各省卽都下鉅公亦有奉爲圭臬者 鮑康觀古閣叢稿路子端侍御見和詠泉長律三十四韵再疊奉酬憶向都門去欣窺鄴架全平遮窗皎潔圍作壁精堅甲乙排鱗次縱橫訝繡聯軼揆秦漢上槩記宋元前香逐身籤冷輝生錦贖鮮祕書曾補綴寫本更端妍倉許儕曹氏

船應傲米顛丹黃勞點訂縹碧耐鑽研志續晁公武人如
邊孝先佳辰頓造訪鎮日共流連世有論癡客時深翰墨
緣祇誇陳玉躩也自質金鈿充棟層軒鎖盈車遠道牽新
如手未觸讀笑願虛懸縱詡桓譚富何曾伏勝傳蝕徒共
蠹飽澆或篆蝸涎誰及南臺彥深居小洞天奇貪應誚賈
清福勝登仙斐几明於鏡芸編白似絲分鈔禿筠管補逸
潑松煙縷密紛能析珠穿爛若駢舊觀還許證真面識良
便駿業名山擅駒光福地延報瓊宐倒篋引玉但拋磚蒲
截原推路槎乘伉効騫參峇齊采掇梨棗倍雕鐫定喜增
新帙無忘寄彩箋癡懷思借住妙悟得真詮願絮人三五
還拌酒十千甘居譬校列一一爲塗鉛白注云子端藏書

六萬餘卷多宋元雕本有蒲編堂書目八十卷又云子端
慨晉以前書多名存篇帙因取他書所引證者一一析而
出之俾還舊觀作漢魏遺書續鈔已成四十餘種 昌熾
案子端爲閏生太史之子太史制義風行天下三家村塾
寶爲金科玉律子端獨篤志好古藏書甚富其後人筮仕
於淮乙酉之秋捆載遺書到吳求售余曾得舊刻數種有
正統本兩漢書陳簡莊歎爲至佳者爲丁泳之丈所得至
今猶懸夢寐中也

樓臺海上湧金銀織罽西來白大秦誰識子雲高閣畔遺書

寂寞訂先民

郁松年萬枝

顧秉源潤齋

同治上海縣志郁松年字萬枝號泰豐恩貢生好讀書購

藏數十萬卷手自校讐以元明舊本世不多見刊宜稼堂
叢書 師友淵源記松年饒於財凡宋人典籍有未刻或
刻而版廢者不惜重資以羅置鄴架吳門黃氏百宋一廛
所藏歸山塘汪閩源家近亦散布而入滬濱矣 莫氏宋
元舊本書經眼錄魏鶴山毛詩要義三十八卷儀徵相國
采進遺書亦未見上海郁泰峰氏乃搜獲曹棟亭舊弄宋
槧本于嘉興士家海內更無第二本遂卓然爲宜稼堂數
十宋槧之冠 甘泉鄉人稿沈曉滄炳垣寄贈徐君渭仁
新刻思適齋集詩沈侯嗜好別流俗休沐逍遙辭劇務好
事近得郁與徐異書校勘爲點注自注云上海郁松年所
刻宜稼堂藏書曉滄亦曾相贈徐郁兩君所刻書皆曉滄

精心爲之校定

持靜齋藏書日建康實錄有郁泰峯已

酉年所收書印

松江府志顧秉源字潤齋南匯人監生

少有神童目長益探討經史購藏書萬卷人擬之小瑯嬛

吳下名園顧辟疆蛾眉列屋爲添香荒攤敝紙難收拾竟使

遺聞付夢梁

顧沅湘舟

錢泰吉可讀書齋詩集吳山遇吳門顧湘舟沅知其收藏
舊籍及金石文字甲於三吳劇談良久旣而過訪寓齋以
其姬人綠卿素君紫娟合書團扇見贈屬題繡餘讀書圖
率成三絕句東吳顧文學卅載舊知名閱肆得相遇高談
四座驚贈我白團扇丹青一一工腐儒無豔福也幸拂清
風南面百城擁豪於列屋居豈知讀書後分校數行書

丁氏持靜齋書目周易旁牋顧沅家藏有古吳武陵叔子
湘舟氏珍藏印樊川文集有武陵懷古書屋收藏秘香閣
收藏顧沅湘舟氏諸印徐正字文集顧沅跋云山陰沈霞
西精抄本紹郡獲此如得奇珍昌熾案湘舟別疆園在郡
城南橋西街庚申之劫其所藏盡爲豐順丁中丞捆載以
去持靜齋書目所著錄多其家書也去歲己丑余游琉璃
廠閱肆在一荒攤見破書三冊皆湘舟哀刻同時人贈言
及所刻書序初僅索價京錢三四千繼視余把玩不釋疑
爲奇貨可居遽藏去不肯售湘舟遺事遂不能詳至今耿
耿於懷不能去也

世上居然有唐本千年古鏡出塵埋虺隕我亦馬生疥欲得

君家枯柳指

莫友芝子儼

曾文正公翰林院庶吉士遵義府學教授莫君墓表君諱
與儁字猶人一字傑夫貴州獨山人嘉慶己未進士子九
人友芝辛卯科舉人 松江府續志流寓傳莫友芝字子
儼博學嗜古尤精小學著有邵亭文抄 友芝唐寫本說
文解字木部箋異引同治改元初夏舍弟祥芝自祁門來
安慶言黟縣宰張廉臣有唐人寫說文木部之半篆體似
美原神泉詩碑楷書似唐寫佛經枯栢諱闕而柳印不闕
例以開成石經不避當王之昂蓋在穆宗後人書矣余命
錄副以來廉臣見祥芝分毫摹似倉猝不得就慨然歸我
近人獲蜀石經殘拓寶過宋槧矧此千歲祕笈絕無副迆

逕須冠海內經籍傳本何僅僅壓皖中名蹟也廉臣名仁
法陝西山陽進士 又詩云湘鄉相公治經如治兵號令
罷茶齟齬皆靖嶭莫府軍閒結習在刊徐左許時鏗鏗謂
余此卷雖晚出試數四部官私誰弟一元鈔宋刻總奴隸
爲子性命耽書報良直 曾文正公題詞插架森森多於
笥世上何曾見唐本莫君所得殊瑰奇傳寫云自元和時
問君此卷有何珍流傳顯晦經幾人君言是物少微識殘
賤黯黹不能神豪家但知貴錦裘陋巷誰復憐綦巾黜縣
令君持贈我始吐光怪干星辰許書劣存二百字古鏡一
掃千年塵篆文已與流俗殊解說尤令耳目新乾嘉老儒
耽蒼雅東南嚴段并絕倫就中一字百搜討詰難蠶起何

斷斷暗與此本相符契古懃正合今時輪乃知二徐尙鹵
莽詒誤幾輩徒因循我聞此言神一快有如枯柳指馬疥
我昔趨朝庶陪尹頗究六書醫頑蠢四海干戈驅迫忙十
年髀肉銷磨盡卻思南閣老祭酒舊學於我復何有安得
普天淨機槍歸去閉戶注凡將 昌熾案莫君所著宋元
舊本書經眼錄三卷增錄二卷其家已刊行子繩孫跋云
同治乙丑迄己巳先君客游所見或解題或攷其槩鈔善
劣或僅記每葉行字數目或並錄其序跋及藏家跋語印
記皆經眼時隨筆志之以備循覽繩孫謹次爲三卷更集
他書衣及碑帖題語爲二卷增焉我家影山草堂僻在黔
南舊藏粗備尤多先人手澤亂後散佚略盡不可復得今

卷中勵存一二先君少時所校也念之泫然同治癸酉七月丁未朔第二男繩孫謹志於江甯旅舍

山外風煙蟬蚓鳴山中金壁光瑩瑩百楹樓屋容登未好趁洞庭湖水平

劉康春禧

袁芳瑛漱六

何紹基東洲草堂集閱甯鄉劉春禧康紅豆山房藏書日喜而有贈藏書不解讀如兒嬉戲得珠玉讀書不能藏如千里行無糗糧劉侯生自湖湘秀要與俗儒飾寒陋善本瑩瑩金壁光古人堂堂天地壽深山樓屋可百楹新篇蠹冊皆有情山中日月聖賢宇山外風煙蟬蚓鳴賤子藏書無最目讀書貪多不貪熟正流歧港各有曾要與壑源同一族示君此語然未然何時鉛槧相周旋期君來躡蓬山

路其校金繩冊府篇昌熾案湘中袁漱六芳瑛乙巳進士官松江知府其臥雪樓藏書極富黃再同前輩曾見其書目四大冊漢書宋元刊本多至十許部餘可知矣李木齋同年隨父中丞公宦湖南得其書最多

未聞脈望餐煙火豈有爰居饗鼓鐘君本清才難作吏可憐橫死到黃龔

劉履芬彥清

高心夔代理江蘇嘉定知縣劉君墓志銘君諱履芬字彥清生於雲間故號泖生以同知直隸州充蘇州書局提調光緒五年江南鄉試嘉定知縣程其珏調分校君往代受事之日民先有逼嫁致死督部檄一幹下縣決殺者君已不憚此幹笑侮之因迹求民間數事密聞諸臺勾捕盡得

君慈恕不忍文致親送囚行省且陳其疑此幹請必盡殺
 迺止君痛悔失圖茹惜危遽不自勝反嘉定疾作滿有日
 矣或詐告殺人需詣驗君神明已傷仰天言吾德薄災殃
 及民不如死也其日不食夜分不寢遲明從者叩肩無聲
 翹而入僵於地喉骨斷裂血污被膺右手短翦握固未脫
 几爛將跋洗冤錄端展宛然事上撫部固始吳公重君所
 以死也厚卹之 又劉彥清莎廳課經圖冊書首吾之君
 所恆見以面覆書書上下五色相刺字紉句緝充篋溢架
 耳目所際身所周旋皆書寒暑晦明殆不徵其氣候與游
 八九年樂未有以徙也 葉裕仁劉泖生莎廳課經第二
 圖後序江山劉泖生刺史性嗜書遇善本必傾囊購之其

不能得者手自鈔錄日課數十紙終日伏案矻矻未嘗見
 其釋卷以嬉也 昌熾案泖生先生與余為忘年交其子
名毓盤先生歿時甫襁褓今已為學官弟子且能讀父書
矣顧先生廉吏家貧甚其書已不能守頃聞吳中有持元
刻郭茂先樂府陸敕先校本求售此先生秘笈余所素知
者也此書出先生之書盡出矣

雷塘弟子追成錄雪苑賓僚憶賦詩猶是羽陵親到處不堪
 東閣再窺時 座主潘文勤公諱祖蔭 黃子壽師諱彭年

潘文勤師圖書金石之富甲於吳下其藏書印曰八求精
 舍曰龍威洞天曰分塵百宋迺架千元癸未奉諱歸吳延
 昌熾館於滂喜齋盡窺帳祕宋刻金石錄十卷即敏求記

所稱馮研祥家本宋刻白氏文集殘本後村先生集殘本
葛歸愚集淮海居士長短句皆士禮舊藏北宋本廣韻則
澤存張氏所采祖本也其他高編大冊斷壁零縑皆世間
希有之秘每覩一書輒爲解題成滂喜齋讀書記二卷賞
析之樂宛如昨日客冬十月遽遵龍蛇之厄越月而又聞
貴筑黃子壽師歿於鄂渚師開藩吾吳獎掖寒峻惟恐不
及昌熾受知最深戊子之冬公子再同編修相約至京館
於其邸得盡見所藏書再同孤介違俗顧獨與余有水乳
之契病肺誤服溫劑致失音驟聞大變一慟幾絕正月南
旋朋輩往送別皆憂其不起乃未幾而訃至矣余此稟再
同管錄副而文勤師欲爲付梓不意數月之間師友淪喪

此筆賦此不勝梁木之感云辛卯二月晦日

標識分明卷帙精鞠花涼雨盪簾旌崇天籟珍藏印又見
敵翁與石笋楊繼振幼雲 崇恩語鈴

鮑康爲繼幼雲跋幣拓冊子春字同年之弟幼雲與余有
同癖壬申解組旋都下聞幼雲收藏益富 又爲幼雲跋
陳氏十鐘拓冊煙雨初過盆菊已花披讀數過不覺紅日
之西墜塵海中獨余與幼雲最間儻從往來必以墨拓相
示未始非清福之一端也 又獻柬繼幼雲許從來同癖
氣相求拓本紛傳等置郵涼雨一簾花滿屋翩然塵海兩
閒鷗 昌熾案春字先生諱宜振漢軍鑲黃旗人道光乙
巳 恩科進士工部侍郎同治乙丑視學江蘇昌熾以童

子受知幼雲先生不獨藏泉最富金石圖書亦皆充牣近
漸散佚昌熾得其奇零小種藏印纍纍每册有楊字圓印
石等館猗歟又雲印卷首有長方巨印其文曰子席先世
之澤有田可耕有書可讀自少及長嗜之彌篤積歲所得
益以青箱舊蓄插架充棟無慮數十萬卷暇日靜念差足
自豪顧書難聚而易散即偶聚於所好越一二傳其不散佚
殆盡者亦鮮矣昔趙文敏有云聚書藏書良非易事善觀
書者澄神端慮淨几焚香勿卷腦勿折角勿以爪侵字勿
以唾揭幅勿以作枕勿以夾刺予謂吳興數語愛惜臻至
可云篤矣而未能推而計之於其終請更衍曰勿以鬻錢
勿以借人勿以貽不肖子孫星鳳堂主人楊繼振手識并

以告後之得是書而能愛而守之者又題後云子藏書數
十萬卷率皆卷帙精整標識分明未敢輕事丹黃造劫楮
素至簡首卷尾鈐朱纍纍則獨至之癖不減墨林竊用自
喜究之於書不爲無補 又案宗室語鈐方伯崇恩亦富
收藏身後爲琉璃廠肆雅堂捆載而去裝潢精整觸手如
新余近得其所藏劉燕庭金石苑卷首一印曰語鈐所藏
初印精本得者寶之庶傳久遠其餘藏印曰玉牒崇恩曰
繡漪精舍曰繡漪老漁曰壺青閣曰澹園曰敬翁曰澗邨
聽鼓秋風卧白門舊游無復海王村同時一個君先弱珍重

錢唐宋板孫 朱澂子清

咸豐庚申英人焚 淀園京師戒嚴持朱提一笏至廠肆

即可載書兼兩仁和朱修伯先生得之最多長子澂字子清次子潛字子安先後以道員需次江甯子清亦好聚書家藏既富又裒益之精本充物著結一廬書目庚寅子清病歿遺書八十櫃聞盡歸張幼樵副憲幼公朱氏壻也孫銓伯貳尹名鳳鈞與子清同鄉藏單行本魏志撫州本公羊皆世間絕無之本簿錄之學一時無比人呼爲宋板孫云

蓬萊道山皆荒渺芳茱疏雨亦寥寥守先高閣茗溪畔紉縵卿雲覆絳霄

陸心源剛父

李宗蓮函宋樓藏書志序余少識潛園先生於鄉校先生博聞綴學偶見異書傾囊必購備兵南韶丁封翁艱歸裝

有書百積迺復近鈔遠訪維日孳孳林居六年有何假南面之樂 詔書再起權總閩離被構罷歸誓墓不出而求書之志益勤殆蘇長公所謂薄富貴而厚于書者耶十餘年來凡得書十五萬卷而坊刻不與焉其宋元刊及名人手鈔手校者儲之函宋樓中若守先閣則皆明以後刊及尋常鈔帙案 四庫書目編序而以近人著述之善者附益之念自來藏書未能垂遠今春奏記太府以守先閣所儲歸之於公而以函宋寶藏舊刻精鈔爲世所罕見者輯其源委仿貴與馬氏竹垞朱氏月霄張氏例成藏書志一百二十卷自古言藏書者嫻嬛石室蓬萊道山皆荒渺無足徵信若吾鄉富于典籍者梁沈約聚書二萬卷見于

本傳宋元之際月河莫氏齊齋倪氏寓公若資中三李陵陽牟氏皆不下數萬卷周草窗三世積累有書四萬卷癸辛雜識稱石林葉氏有十萬卷然考少蘊避暑錄話亦祇謂家舊藏書三萬餘卷而已惟直齋陳氏書錄解題之作可考見者五萬一千餘卷明代白華樓茅氏其卷數不可考然九學十部之編以制藝爲一部則其取盈緗帙者亦僅矣近乾嘉開石塚嚴氏芳棠堂南潯劉氏疏雨山房皆以藏書名余嘗見二家書目著錄寥寥豈足與先生比長絜短哉歸震川先生云書之所聚當有如金寶之氣卿雲輪困覆護其上余與先生衡宇相望長空糾縵庶幾旦暮遇之 昌熾案存齋儀顧堂題跋言明人書帕本刻書而

書亡又糾汪刻衢氏讀書記之謬謂不如不刻善矣然其所刊叢書亥豕縱橫不可殫述几塵風葉未可輕下唯黃也公子純故中翰嘗爲余言守先閣藏明人集至多吾吳先哲如都南濠楊君謙皇甫司勳之類無所不有登閣傳鈔俟諸異日謹書於此以當息壤

吳兒織嗇好治生不狂迺竟得狂名我來長嘯書鈔閣下有
蝸蟻聚沸羹 蔣鳳藻香生

同邑蔣香生太守鳳藻家世貨殖納貲爲郎嗣以知府分發福建補福甯府爲陳伯潛學士所論奏開缺送部引見遂不出君雖起自素封未嘗學問而雅好觚翰嗜書成癖在閩納交周季貺司馬盡傳其目錄之學又與仁和魏稼

孫錫曾談金石甚契頗得其緒餘閩垣未經兵燹前明徐興公謝在杭及近時帶經堂陳氏遺書流落人間者君畱心搜訪多歸插架季貺絺誤遣成君賞以三千金季貺盡以所藏精本歸之遂蔚成大國舊鈔本北堂書鈔孫淵如嚴鐵橋兩先生所手校君築書鈔閣貯之以余粗涉校勘屬刊鐵花館仿宋本六種及心矩齋叢書一字異同郵筒商榷至於再三不可謂非精於鑒別者矣吾吳自咸同以來壇坫闕如一二達官之好古者皆在朝居鄉士大夫無能提倡而猗頓之徒奉錢神爲職志三君八顧諡爲至愚百宋千元駭若河漢君少通悅不矜細節尤爲里中兒所賤簡聞君收藏書籍譁然相告引爲破家殷鑒及君歿而

市駿者懸巨金以求發篋則又動色嗟訝嗟乎自蕘圃香岩距今不過百年何以風流歇寂月旦舛淆望影吠聲羣自居於原伯魯亦書林之一厄也余幼長里閨寄食東陵習聞治生之說雖好書而不能不斷斷論價精鈔祕槧交臂失之每一回思如象罔之珠不可再得八識田中畱一苞稂種子蓋剷除三十年而未能盡也嗟何及矣

清淚淒然滴玉蜍非能說夢竟何如傷心獨拜他鄉臘更啟

殘書祭歲除

泰山趙氏

宛陵太守

沈率祖

天祿琳瑯說文五音韻譜有閩南開府所得之書泰山趙氏藏書之印 又明刻陳書有沈率祖奉守遺書之印 又明刻周書有宛陵太守書籍六男翰臣珍藏一印下六

字分行小注 昌熾案兩家子弟保守遺書可敬可愛爲人後者若以兩賢之心爲心晉江父子不得尋美於前雖名氏僅存不可不表而出之袁宗不幸家嗣傾亡伏臘他鄉孑然顧影平生緇羅散失雖不逮藏家之什一要於古人不爲無補已矣今且爲若敖之鬼矣楹書付託悵望何年微帚自珍此心靡懈亦聊賢於博奕而已丁酉上元後

四日記

天策文章花藥詩一簽一笠鎮相隨非無三乘笏行字胡跪

問師師不知 釋文瑩道溫

文瑩玉壺清話序玉壺隱居之潭也文瑩收古今文章著述最多自國初至熙甯間得文集二百餘家 又文瑩至

長沙首訪故國馬氏天策府諸學士所著文章擅其名者惟徐東野李宏臬東野詩浮脆輕豔侑一時尋俎爾宏臬雜文十卷皆駢枝章句雖齷齪者亦能道信乎行文之難也 又續湘山野錄王平甫安國奉詔定蜀民楚民秦民三家所獻書可入三館者令令史李希顏料理之其書多剝脫而得一徹紙所書花藥夫人詩乃花藥手寫而其詞甚奇棄之可惜遂令令史郭祥繕寫入三館禹玉相公傳其本於是盛行於時文瑩親於平甫處得副本凡三十二章 鮑廷博玉壺清話跋宋僧文瑩字道溫錢唐人工詩喜藏書尤畱心當世之務

前弁諸果後弁獵不倪不若類從其送書道士形如繪相鶴

何如竟相龜

陳景元

無爲道士

避暑錄話程光祿師孟吳下人喜爲詩效白樂天而尤簡直至老不改吳語元豐間道士陳景元博識多聞藏書數萬卷士大夫樂從之游身短小而偃師孟嘗從求相鶴經得之甚喜作詩親攜往謝末云收得一般瀟灑物龜形人送鶴書來徐舉首自操吳音吟詠之諸弟子在旁皆忍笑不能禁時王侍郎仲至在坐顧景元不覺失聲幾仆地東觀餘論跋陳碧虛所書相鶴經後云隋善書者丁道護適媚有法今觀碧虛子陳君小楷殊得道護筆勢 通志校讐略臣嘗見鄉人方氏望壺樓書籍頗多其家云先人守無爲軍日就一道士傳之尙不能盡其書也如唐人文

集無不備

這箇幾時近飯喫那箇幾時近飯喫想見闈房交訕時敗飯生塵爨煙絕 換書士人

道山清話張文潛嘗言近時印書盛行而鬻書者往往皆士人躬自負擔有一士人盡掎其家所有約百餘千買書將以入京至中途遇一士人取書目閱之愛其書而貧不能得家有數古銅器將以貨之而鬻書者雅有好古器之癖一見喜甚乃曰毋庸貨也我將與汝估其直而兩易之於是盡以隨行之書換數十銅器亟返其妻方迓夫之回疾視其行李但見二三布囊磊塊然鏗鏗有聲問得其實乃嘗其夫曰你換得他這箇幾時近得飯喫其人曰他換

得我那箇也則幾時近得飯喫因言人之惑也如此座皆絕倒

打包僧似野雲孤善本煩師寄澈湖蟬藻鴈鏡相映碧剔鏡圖後贈書圖

程洪溥木庵

錢泰吉跋衛氏禮記集說癸卯徽州程木庵洪溥以通志堂經解寄贈余有詩紀事并繪贈書圖以報木庵之贈以余曝書雜記有未得衛氏禮記集說語既得集說竟未循覽木庵爲傷惠矣勉讀一過冀無負木庵耳 又可讀書齋集徽州程君木庵洪溥博物好古延海昌六舟上人達受爲拓所藏鐘鼎彝器欵識六舟贈以蔣氏別下齋叢書木庵見余曝書雜記深相契合讀至第二卷知余未有通

志堂經解因以儲藏副本屬六舟弟子虛山攜贈訂交賦誌二律九經一百四十部唐宋元明眾說殫近愧專家忘舊業遠煩善本寄新安交論異地勞相賞客詫奇緣索其觀一藝未通嗟已老短書敢誦合叢殘平生恨未識陳元聞道山居述作繁絕品銘心勤譜錄奇辭奧指溯根源漫誇博士書驢券難共高人隱鹿門韻事流傳到儒釋遺經善守助兒孫 又題程木庵小像何時短棹訪衡茅來與山僧共打包又云昨寄贈書圖一卷黃山深處伴幽居自注木庵贈予通志堂經解予屬海昌道士汪鶴憩雲寫贈書圖卷前畫木庵六舟及予小像同人多爲題詠昨歲以寄木庵 蔣光煦東湖叢記余幼時舅父馬兩如公鈺賜

以全唐文嗣從同邑吳鱸鄉茂才假拜經樓藏本以資校勘而徽州程木庵翰目洪溥因六舟上人貽以式古堂書畫彙攷尤難得也何紹基竟甯銅雁足鐙詩序六舟上人爲程木庵拓輯彝器文字中有此鐙相傳爲建安鐙也六舟鍼剔璽印字畫朗朗深自矜喜屬陳月波作剔鐙圖編已像於盤底之間作握鍼剔剝之狀又題程木庵所藏彝器拓本家學未荒蟬藻碧古光先證雁鐙紅

做帚千金久自珍明珠脫手尙逡巡勸君不用波斯襲此去
豪家盡柳津 沈峙公

厲鶚樊榭山房詩集鬻書和沈峙公收處心常損拈來淚欲垂誰憐非長物竟遣易晨炊宿讀人難得長貧我自知

祇愁肉食者還有鬼名嗔自注南史人勸柳津聚書答曰
吾嘗請道士上章驅鬼安用此鬼名耶 彭兆蓀小謨觴
館集賣書行十家士人九不給貧極捻書成俗習萊蕪室
內鳴飢腸故紙堆中摻秘笈當年甲乙重標題萬卷遙知
費編輯芸葉曾防羽陵蠹錦暉或用波斯襲浮雲世事不
可久卻爲兒孫覓升斗遺業曾無八百桑舊家自有千金
帚傾筐倒篋驅鱣魚載以兼兩薄畚車易錢難比瑤華乘
書卷分明博士驢富兒有書不解讀貧兒欲讀無其福餅
金輦致玩好同插架牙籤手誰觸白氏楊枝臨去吟教坊
後主新降曲明珠脫手各傷心同向豪家成一哭東鄰西
舍何紛紛此厄不啻江陵焚平生我亦書是癖搜羅八索

窮三墳飢來貸盡監河米獨抱遺經不求濟請讀難窺中
祕書癡懷尙羨何間邨年年乞食非良圖此事甯保他年
無徑須急辦五畝區去作識字耕田夫倉箱謀卒歲杭稻
收東吳穰穰但祝年屢豐雖貧不賣杵與舂人間長策無
如農農夫一笑稱未善君不見鉏犁昨爲輸租典

誰描蛟蝶繡鴛鴦紙尾題詩欲斷腸自是簪花書格妙新篇

一一和琳琅 陳坤維

鴈鶡樊榭山房集桑叟甫水部買得元人百家詩後有小
牋黏陳氏坤維詩蓋故家才婦以貧鬻書者惜不知其里
居顛末爾讀之有感次韵一首并徵好事者和焉姓字深
閨豈易知偶傳紙尾賣書詩難追寫韻仙家事應共牽蘿

絕代悲彤管更添高士傳墨卿別注有情癡迴腸似其縑
湘往惆悵令人展卷時附陳氏坤維原作典及琴書事可
知又從案上檢元詩先人手澤飄零盡世族生涯落魄悲
此去雞林求易得他年鄴架借應癡亦如長別無由見珍
重寒閨伴我時丁巳又九月九日厨下乏米手檢元人百
家詩付賣以供糲粥之費手不忍釋因賦一律媵之陳氏
坤維題 汪遠孫次閨秀陳坤維手題元人百家詩韻詩
在方雲泉隲處寂寞闈心一卷知臨池親寫媵書詩窗前
風雨牽蘿恨貧裏光陰輟筆悲破甑生塵空性巧殘編惜
別最情癡百年遺墨流傳在幾度重陽遇閨時 兩浙輶
軒錄謝垣買得漢隸分韵舊本中夾繡鍼絲線花樣諸物

章程墨妙慕無雙
狐腋千金集眾長
染練已憐描蛺蝶
懸鍼猶記繡鴛鴦
蔡邕遺法能傳女
衛鑠浮名空蔽王
欲使簪花臨筆陣
青牛文帳護琳瑯

範銅制出膠泥上
屈鐵縈絲字字分
一日流傳千百本
何人不頌會通君

畢昇

華燧文輝

華瑤

華堅

夢溪筆談慶歷中有布衣畢昇爲活板其法用膠泥刻字薄如錢脣每字爲一印火燒令堅先設一鐵板其上以松脂蠟和紙灰之類冒之欲印則以一鐵範置鐵板上乃密布字印滿鐵範爲一板持就火湯之藥稍鎔則以一平板按其面則字平如砥若止印二三本未爲簡易若印數千百千本則極爲神速 邵文莊會通君傳會通君姓華氏

諱燧字文輝無錫人少於經史多涉獵中歲好校閱同異輒爲辨証手錄成帙遇老儒先生卽持以質焉旣而爲銅字板以繼之曰吾能會而通之矣乃名其所曰會通館人遂以會通稱或丈之或君之或伯仲之皆曰會通云君有田若干頃稱本富後以劬書故家少落而君漠如也三子塤奎璧 嚴元照書容齋隨筆活字本後此翻宋紹定間所刻每番中縫上方有宏治歲在旃蒙單闕八字下有會通館活字銅板印八字書後有華燧序 天祿琳瑯白氏長慶集每卷末有錫山蘭雪堂華堅活字桐板印記 無錫縣志華瑤字汝德以貢授大官署丞善鑿別古奇器法書名畫築尙古齋實諸玩好其中又多聚書所製活板甚

精密每得祕書不數日而印本出矣昌熾案燧之子填奎
壁名皆從土旁埕堅疑亦其羣從而理爲埕之誤余所見
蘭雪堂活字本又有蔡中郎集甚精

聖人

詔下紫泥緘海岳遺聞訪翠巖唐宋元明朝市改一家世業
守雕劒

建安余氏

九經三傳沿革例九經世所傳本以興國于氏建安余氏
爲最善逮詳考之余本間不免誤舛不足以言善也天
祿琳瑯續編儀禮圖是本序後刻崇化余志安刊於勤有
堂按宋板列女傳載建安余氏靖安刻於勤有堂乃南北
朝余祖煥始居閩中十四世徙建安書林習其業二十五

世余文興以舊有勤有堂之名號勤有居士蓋建安自唐
爲書肆所萃余氏世業之仁仲最著岳珂所稱建安余氏
本也又禮記每卷有余氏刊于萬卷堂或余仁仲刊於
家塾續東華錄乾隆四十年正月丙寅諭軍機
大臣等近日閱米芾墨蹟其紙幅有勤有二字印記未能
悉其來歷及閱內府所藏舊版千家注杜詩向稱爲宋槧
者卷後有皇慶王子余氏刊於勤有堂數字皇慶爲元仁
宗年號則其板似元非宋繼閱宋板古列女傳書末亦有
建安余氏靖安刊於勤有堂字樣則宋時已有此堂因考
之宋岳珂相臺家塾論書板之精者稱建安余仁仲雖未
刊有堂名可見閩中余板在南宋久已著名但未知北宋

時卽行勤有名堂否又他書所載明季余氏建板猶盛行是其世業流傳甚久近日是否相沿並其家刊書始自北宋何年及勤有堂名所自詢之閩人之官於朝者罕知其詳若在本處查考尙非難事着傳諭鍾音於建甯府所屬訪查余氏子孫見在是否尙習刊書之業並建安余氏自宋以來刊印書板源流及勤有堂昉於何代何年今尙存否或遺蹟已無可攷僅存其名並其家在宋時曾否造紙有無印記之處或考之志乘或徵之傳聞逐一查明遇便覆奏此係攷訂文墨舊聞無關政治鍾音宜選派誠妥之員善爲詢訪不得稍涉張皇尤不得令胥役等借端滋擾將此隨該督奏摺之便諭令知之尋據奏余氏後人余廷

勳等呈出族譜載其先世自北宋建陽縣之書林卽以刊書爲業彼時外省板少余氏獨於他處購選紙料印記勤有二字紙板俱佳是以建安書籍盛行至勤有堂名相沿已久宋理宗時有余文興號勤有居士亦係襲舊有堂名爲號今余姓見行紹慶堂書集據稱卽勤有堂故址其年代已不可攷昌熾案 四庫著錄林之奇尙書詳解黃倫尙書精義亦皆建安余氏刊其他見於各家書目者不知凡幾翠巖精舍所刊本有玉篇元文類陸宣公奏議注

臨安鬻書陳道人芸香累葉續芸類其他鞞鼓橋頭宅亦與

江鈿共姓陳 陳起宗之 陳思 陳世隆彥高

方回瀛奎律髓陳起睦親坊開書肆自稱陳道人字宗之

能詩凡江湖詩人皆與之善嘗刊江湖集以售宗之詩有
云秋雨梧桐皇子府春風楊柳相公橋哀濟邸而諄彌遠
也或嫁其語於敖器之言者論列劈江湖集版宗之坐流
配 戴表元題孫過庭書譜後杭州陳道人家印書書之
疑處率以己意改令諧順殆是書之一厄 陳伯玉寶刻
叢編序都人陳思儂書於都市士之好古博雅蒐遺獵忘
以足其所藏與夫故家之淪墜不振出其所藏以求售者
往往交於其肆且售且儂久之所閱滋多望之輒能別其
真贗 楊復吉夢闌瑣筆陳思彙刻羣賢小集自洪邁以
下六十四家流傳甚罕鮑以文詩云大街棚北睦親坊歷
歷刊行字一行喜與太邱同里開芸編重擬續芸香注云

陳解元詩名芸香彙子名續芸 楹書隅錄錢心壺先生
跋所藏棠湖詩彙云卷末稱臨安府棚北大街陳氏印行
者卽書坊陳起解元也賈斯棟稗販以南宋名賢遺集刊
於臨安府棚北大街者爲陳思而謂陳起自居睦親坊然
予所見名賢諸集亦有稱棚北大街睦親坊陳解元書籍
鋪印行者是不爲二地且起之字芸居思之字續芸又疑
思爲起之後人也予按羣賢小集石門顧君修已據宋本
校刊亦疑思爲起之子思又著有寶刻叢編尤爲淵博蓋
南宋時臨安書肆有力者往往喜文章好撰述而江鈿陳
氏其最著者也 錢大昕菑圃搜奇跋元末錢唐陳世隆
彥高天台徐一夔大章避兵構李相善彥高篋中攜祕書

數十種檢有副本悉以贈大章大章彙而編之世無刊本
詒宋樓藏書志宋詩拾遺二十三卷舊鈔本元錢唐陳
世隆彥高選輯按世隆書賈陳思之從孫 天祿琳琅容
齋隋筆目錄後記臨安府輓鼓橋南河西岸陳宅書籍鋪
印考杭州府志輓鼓橋在城內西北隅當時臨安書肆陳
氏多著名 昌熾按陳思所撰尙有書苑菁華十二卷海
棠譜二卷今皆存

三輔黃圖五色描別風枋詣望嶠曉尹家鋪子中和宅並峙
南朝與北朝 尹家書籍鋪 平水書籍王文郁

志雅堂雜鈔先子向寓杭收異書太廟前尹氏嘗以采畫
三輔黃圖一部求售每一宮殿各繪畫成圖甚精妙爲衡

人柴氏所得 讀書敏求記茅亭客話十卷元祐癸酉西
平清真子石京募工鏤版此則尹家書籍鋪刊行本也
士禮居題跋記續幽怪錄四卷臨安府太廟前尹家書籍
鋪刊行本也茅亭客話遵王記之而此書絕未有著於錄
者可云奇秘矣 許古新刊韻畧序平水書籍王文郁見
禮部韻嚴且簡私韻又無善本精加校讎少添注語僕嘗
披覽賢於舊本遠矣 錢大昕跋平水新刊韻畧黃蕘圖
孝廉得平水新刊韻畧元槧本前載正大六年河間許古
道真序卷末有墨圖記二行其文云大德丙子重刊新本
平水中和軒王宅印或卽文郁之後 昌熾案道真序後
署書於嵩郡隱者之中和軒則王宅卽爲文郁之後無可

疑者自正大六年己丑至大德丙午已七十餘年書林世業亦北方之余氏矣

一舟打頭小於葉帆檣下春書三篋千載龍邱有兩賢前蓑後珮聲相接

童珮子鳴

王世貞童子鳴傳童子鳴名珮世爲龍游人父曰彥清子鳴少依父游詩有清韻尤善攷證諸書畫名跡古碑彝敦之屬兄珊舉於邑爲諸生子鳴歸必就兄書舍買升酒相勞苦高淳韓邦憲出守衢行部過其家龍邱山塢中索所輯唐故邑令楊炯邑人徐安貞集毀梓行之遂下教邑綱紀南州杜門文學首驂北海爲政康成標里龍邱逸民之藪前蓑後珮千載兩賢蓑猶託跡功曹一試綦組而童君

畢志雲蘿聲迹俱控可謂嶢然不滓瞻之在前矣其樹楔左間以風在野子鳴卒年僅五十四有藏書萬卷皆其手所雋校列朝詩傳童書賈珮字子鳴一字少瑜從其父以鬻書爲業往來吳越間買一舫不能直項帆檣下皆貯書讀之窮日夜不休王漁洋跋童子鳴集余觀南宋陳思撰寶刻叢編歎書賈中乃有嗜古雅尙如斯人者龍游童子鳴亦以賈書有詩名其集吳郡黃河水所定凡六卷翁年七十瘦如柴日走公卿一刺懷袖有奇書休問訊老韋

高價本難諧

老韋

李文藻琉璃廠書肆記瑞錦堂卽老韋之舊肆本名鑑古堂八年前書甚多又云延慶堂劉氏在路北其肆賈卽

老韋前開鑑古堂近來不能購書於江南矣韋頗曉事而好持高價查編修瑩李檢討鐸日游其中數年前子房師紀曉嵐先生買其書亦費數千金書肆中之曉事者惟五柳之陶文粹之謝及韋也韋湖州人陶謝皆蘇州人又云周書昌嘗見吳才老韻補爲他人買去怏怏不快老韋云邵子湘韻畧已盡采之書昌取視果然又嘗勸書昌讀魏鶴山古今攷以爲宋人深於經學無過鶴山惜其罕行於世書昌亦心折其言韋年七十餘矣面瘦如柴竟日奔走朝紳之門朝紳好書者韋一見諗其好何等書或經濟或詞章或掌故能各投所好得重值而少減輒不售人亦多恨之

儂畫者王儂陶顧市印者吳市硯詹同與陶翁居近市不言

龍斷學雜廉

陶正前皮學

了珠琳蘊輝

孫星衍清故封修職郎兩浙鹽課大使陶君墓誌銘君名正祥字庭學號瑞庵少貧以儂書爲業聞見日廣能知何書爲宋元佳本有誰氏刊本板貯何所誰氏本善且備誰氏本刪除本文若注或舛誤不可從都中鉅公宿學欲購異書者皆詣君車輒滿戶外會開四庫全書館安徽提學朱君筠言於當道屬以搜訪祕書能稱事子珠琳由內廷三館供事敘用得兩浙錢清場鹽課大使貶贈君如其官君在官署逾年教子引退曰汝多疾而素餐不如歸儂書也君既家吳門僑寓都下賢士大夫往來輻輳廣求

故家書籍祕本歷數十年嘗慕陳思之爲寶刻叢編也語
余云恨不爲一書記所過目宋元明刊刻經傳諸子各本
卷帙文字異同優劣補書目家未備惜今晚矣與人貿易
書不沾沾計利所得書若值百金者自以十金得之止售
十餘金自得之若十金者售亦取餘其存之久者則多取
餘曰吾求贏餘以餬口耳人之欲利誰不如我我專利而
物滯不行猶爲失利也當是時都門售書畫有王某售舊
資什器有顧某意見悉如君皆盛行於時老子言欲取必
與左邱明言以欲從人其道然也君以嘉慶二年八月二
日卒於都門春秋六十有六子珠琳以子僑居金陵寄至
元金陵志爲潤筆作君墓碣予念世之稱事者少雖書賈

無復如君之知書也爲文且銘曰不知書何足數斗筭人
媿書賈教子歸來似其祖不求甚解能嗜古我銘其墓不
爲諛兼金可卻書可取 錢儀吉跋董用晦楹帖董君元
鏡名用晦字震陽老人其自號漢軍人乾隆末爲戶部員
外郎年幾七十矣貌黑瘠目近視而篤嗜書終歲尋誦累
置數百冊几榻間卷悉黯敝同時方茶山孫淵如兩先生
與用晦游有市書者陶市印吳市硯詹雖賈皆長者皆七
八十歲淵翁爲之作三老傳者也用晦往往在此三人舍
中談笑閱視日暮忘返 李文藻琉璃廠書肆記五柳居
陶氏在路北近來始開而舊書甚多與文粹堂皆每年購
書於蘇州載船而來五柳多璜川吳氏藏書卽吳企晉舍

人家物也 昌熾案珠琳字蘊輝黃蕘翁稱其熟讀讀書
敏求記為蕘翁購宋本王右丞集即所謂山中一半兩本
元刻許丁卯集即所謂較宋板多詩幾大半本蕘翁得書
多與商榷

不須刮目用金篦根腳題籤望不迷此調書林今絕響空煩
重訪白公隄 錢聽默

嚴元照書春秋經傳集解宋刻殘本後宋刻左傳四卷萃
古齋主人錢景開所貽景開名時霽湖之書估也寓於蘇
州能詩善鑒別宋元版刻并法帖書畫以此書貽我界以
錢不受亦稱有雅尚者 士禮居藏書題跋記白隄錢聽
默開萃古齋素稱識古所見書多異本 又續錄白隄錢

聽默書友中巨擘也其遺聞逸事有關於書籍者所得最
多嘗謂余曰絳雲未火之先有白鬚老人自稱放翁示夢
於汲古閣毛氏謂我有集在絳雲樓曷假之既寤異其夢
遂向假歸越日火發放翁集得免於厄 又向聞錢聽默
言書籍有明刻而可與宋元版埒者惟明初黑口版為然
故藏書家多珍之 顧千里題清河書畫舫常熟錢遵王
毛子晉父子席玉炤陸敕先馮定遠曹彬侯各家書散出
子見之最早最多乾隆年間滋蘭堂主人朱文游三丈白
隄者書賈錢聽默能視裝訂籤題根腳上字便曉屬某家
某人之物 又笠澤叢書跋二十年前老書估錢聽默嘗
告余曰聞吳宮詞大姑蘇兮小長洲善本大作火小作沼

天祿琳琅盤洲集毛抄本有白隄錢聽默經眼一印

蠶絲牛毛善離合得錢卽買酒盈缸書根雙腕能齊下嘉話

真堪繼湧幢 胡質 虞山孫二 錢半巖

湧幢小品荆川先生胡質棺記書備胡質龍游人父兄故
書賈買少乏資不能賈而以善錐書往來諸書肆及士人
家余不自揆嘗取左氏歷代諸史及諸大家文字稍刪次
之以從簡約旣披閱點竄竟則以付質使裁焉始或篇而
離之或句而離之甚者或字而離之其旣也篇而聯之句
而聯之又字而聯之或聯而後離離而後聯錯綜經緯要
于各歸其類而止蓋其事甚淆且碎非特他書傭往往束
手雖士人細心讀書者亦多不能爲此質於文義不甚解

曉而獨能爲此蓋其天竅使然余之於書不能及古人牛
毛繭絲之萬一而質所爲則蠶絲牛毛之事也質平生無
他嗜而獨好酒傭書所得錢皆盡於酒所傭書家不問傭
錢必問酒能厭否質無妻與子傭書數十年居身無一塊
之瓦一醉之外皆不復知也質無一錢之蓄死而有棺無
棺不可知念其爲我從事久也以一棺畀之而書此以爲
之券云 藏書紀要虞山孫姓行二者寫書根最精一手
持書一手寫小楷極工今罕有能者 士禮居藏書題跋
記續錄近事會元五卷裝池出良工錢半巖手近日已作
古人惜哉其子雖亦世其業而其裝池卻未之見不知能
傳父之手段否甲戌閏春復翁偶記

黎邱苗裔徧天下
貲郎駟僮亦人妖
巧儉豪奪夔魑技
徧有蒼頭弄此獠

王廷瑤越石

黃正賓黃石

韻石齋筆談定窯鼎宋器之最精者成宏間藏於吾邑河莊孫氏曲水山房嘉靖間爲京口靳尙寶伯齡所得毘陵唐太常凝庵負博雅名從靳購之遂歸于唐萬曆末淮安杜九如納千金攜鼎以去九如歿傳子生之有王廷瑤者字越石慣居奇貨以博刀錐矚杜生游平康以八百金供纏頭費逆料其無以償且示意不欲酬金而欲得爐也爐竟歸之詭稱其值萬金求售於徐六岳徐惡其譎拒不納乃質於人十餘年間旋質旋贖紛如舉棋又求其族屬之相肖者方圓數種並置篋中多方壘斷泰興季因是企慕

唐爐廷瑤以一方者誑之售直五百金毘陵趙再思舊游於唐稔知此鼎偶過季季問唐家定窯方鼎君曾見否趙大笑曰唐之定鼎體圓而足三公云方鼎何居季廢然曰此獠欺我南科屈靜源吾中州所取士今致書靜源道其事當爲我處之屈君屬有司追理廷瑤抱頭鼠竄挽人講解僅免狴犴焉而黃黃石之事起黃石名正賓以貲郎建言廷杖憑藉聲氣游於搢紳頗蓄鼎彝書畫與廷瑤同籍徽州稱中表有倪雲林山水一幅估價百二十金托廷瑤轉售仍暗記花押於隱處廷瑤心艷倪畫屬高手臨撫待正賓取時卽以摹本還之殊不知有默記也正賓遣蒼頭王佛元取畫裝池宛然惟失花押佛元黠人也謬云主人

不惟遣來取畫兼欲觀定爐且議價耳廷瑀方授爐而正賓亦至謂廷瑀曰奈何作狡獪技倆廷瑀搏頰發誓正賓詰之曰吾有私記今安在正誚讓間佛元從秀執鼎兼以左右指樞鼎耳示無還理廷瑀奪之鼎墮地如裂瓦廷瑀恨絕頭撞正賓傷脇時正賓被逐於南都方鬱鬱不樂又遭廷瑀之侮越夕奄逝廷瑀宵遯潛踪於杭時潞藩寓杭遣承奉俞啟雲咨訪廷瑀出質鼎誇耀把臂甚歡引謁潞藩酬以二千金承奉私得四百金以千六百元畀廷瑀潞藩之主藏吏命一厨役司其筦鑰其人頗椎鹵居無何王欲觀鼎厨役啟匣取鼎戛然有聲忽折一足厨役懼投水死 大兵入杭潞藩赴北承奉沈廢鼎於錢唐江中 詩

宗彥題韻石齋筆談鑑賞本韻事末流乃取闢巧偷與豪奪利必錙銖較茲編紀鼎事朗若然犀照一生無長物方知孝伯妙 珊瑚網馬待詔鶴荒山水圖崇禎丁丑王越石持來余以仇英南極呈祥圖宋版國策一部易之 又蘇文忠書唐方于時天啟癸亥獲觀王越石物 昌熾案李遜之三朝野紀汪文言者歛人也因黃正賓以交於諸君子注云正賓故中書萬厯中以密揭事疏論申吳門之阻冊立廷杖下獄又天祿琳琅錢謙益以千二百金得兩漢書於黃尙寶卷中有黃正賓印亦其人也

補遺

湖峽舟輕濫預堆黃牛灘畔載書回十家何惜中人產一擲

躡鴟沃野財

蜀帥紐鄰之孫

少室山房筆叢豫章漫抄云元至正初史官遣屬官馳驛求書東南異書頗出時有蜀帥紐鄰之孫盡出家資遍游江南四五年間得書三十萬卷遡峽歸蜀可謂富矣又云隋文父子以天下之力收書僅三十七萬遂冠古今元邊帥子罄其一家之產驟得三十萬卷亦宇宙奇事然但欲其多而不計重複則在今甚不難顧正本不知幾何耳古今書籍統計一代前後之藏往往無過十萬統計一朝公私之蓄往往不能十萬所謂天之生財止有此數也況元時板本尙希又非文明之世紐氏子三十萬卷芟其重復政恐不能三萬耳

右藏書紀事詩六卷 太夫子葉緣發先生撰也全書上自五代下至近今旁逮釋道微及坊估凡列載四百有五人附見二百九十五人得詩四百有五首惟生存人不錄焉 太夫子徧覽吳中故家之書又侍從京華博搜載籍積年既久故其書至博且精益爲臧書家一大掌故矣夫自漢廷開臧書之府置寫書之官厥後耽古積書者代不乏人中郎萬卷林宗五千其事蹟載在史冊任昉家貧而聚書萬餘率多異本以及晉張華載書三十乘唐鄴侯插架三萬軸是皆不可沒者是書唐以前人概勿採取則以書有墨刻創於唐末益州摹刻六經始於蒲津毋氏也顧自長興刻木以來書出日富書誤日滋宋元明迄

國朝儲藏家於是憲言校勘並攷辨目錄板本其學之至精博者至黃佖宋顧思適二家爲最大率終身寢饋書窟沒後散佚僅傳書目或並無書目僅一二遺聞及敘跋印記見引於各書不爲類纂懼傷泯沫筆隅狎涉簿錄之學嘗恨古今臧書之人以畢生精力篤守典墳而生無赫赫之名歿有無涯之戚轉不如收藏書畫字帖者尙有題跋之作流傳後世爲骨董家所珍秘今讀是書乃知人人意中欲爲之事不啻爲古人拾骸骨禁樵採矣其功豈尠小也哉原稿自都門寄湘元筆隅師刻之書首總目係後編定與書中前後不同江師屬筆隅爲之讐正詳示手民筆隅勉從斯役凡四閱月几塵風葉仍不能免刻成太夫子又郵寄二函補改多處

其榮王宗綽數條謹酌補入注蜀師紐鄰詩並注一條補增六卷之末惟少室山房筆叢引鄭漁仲曰古文尙書音唐宋並無今出漳州吳氏陸機正訓隋唐二志無今出荊州田氏又漳州吳氏書目算術一家有古書皆四庫三館所無又師春二卷甘氏星經二卷漢官典儀十卷京房易鈔一卷今世所傳皆出吳氏云云當補注卷一吳與可權條又筆叢云龍邱童子鳴家臧書二萬五千卷余嘗得其目頗多秘帙當補注卷六童珮子鳴條因原注皆無可刪併不能推改姑書於此以誌太夫子成書矜慎之意云爾丁酉十月湘潭劉肇隅謹識于學院廣學海堂

